

四庫全書

集部

欽定四庫全書

弇州續稿卷十

明 王世貞 撰

詩部

七言古

輓彭稚脩廣文

當年汝醉長安陌，雙頰殷紅鬢鬢黑。  
才高白戰賈餘勁，命薄青衫消不得。  
訪醫就買吳江船，欲言不言魂黯然。

杯底無蛇影來妬坐隅有鵬心私憐張公吃酒李公醉  
珊瑚誤代王愷碎非關豐獄吐龍泉自是人間不平氣  
豫章城西楓葉秋生將玉塵埋荒丘彭湖只作東流水  
肯洗彭郎磯上愁

五歌

我所痛在薊門青蠅蔽天白晝昏長弘之碧靈均魂失  
不奉之偕九原嵎曦熒熒迴覆盆安能照枯使復溫鳴  
呼一歌兮烏鵲翻使我萬事慚生存何況食肉復乘軒

其二

我所悲在澤州慘澹一紙青天愁乞身為母母不留幾  
欲擲身黃河流升堂總惟啼素秋別時音徽今在否嗚  
呼二歌兮霜風道色難忘養未盡酬有顏敢從毛義游

其三

我所欽在綿竹偏髻明眸映空谷峽濤棧雲莽相屬奮  
欲從之路詰曲倏忽萬里難踪逐飛書自天炯可讀嗚  
呼三歌兮夏哀玉錢鏗七百歎局促朝聞大道夕死足

其四

我所思華不注美人讀書未渠暮  
隕壁湛珠黯非故是時孤臣晉陽路  
青燈夜聞鬼啼訴痛無寶鉤挂君墓  
嗚呼四歌兮逗秋雨君今一語成萬古  
白頭公卿紛可數

其五

我所惜在容城弱孤奮欲除欃槍  
片語觸天天怒驚狂犴血肉紛縱橫  
為君輕身破不平君言汝身未可輕  
嗚呼五歌兮晝吞聲氣塞萬古長如生  
彼豎父子五鼎烹

贈管將軍守備楊舍

將軍自稱三百斤躍馬跳盪風前雲曾探虎穴得其子  
未許麟閣圖元勲千金買名呼國士百戰捐身報知己  
腰間若若未銀黃麾下紛紛半朱紫壘書壘下明光宮  
別部戈船始屬公古人不怕雞林險翻謂天將貴此翁  
第二猶子士驄十八應試與余省捷歲同詩以壯  
之

世皇二十有二載弱冠留京忝材傑折花捲盡朱雀簾

騎馬醉踏長干月垂晚猶塵六卿佐中年已謝三鎮節  
吾家琅玕幸不乏汝今行年亦十八即看蒜髮乳尚腥  
試展霜蹄汗如血故家母但足箕裘往事吾將付衣鉢  
汝生已是氣凌雲汝伯何妨髮如雪長安卿相多少年  
此意雖卑聊為說

金壇王叟六十壽之

同是維山裔况同花甲週唯偏金壇隱獨領瑤池秋瑤  
池碧桃若雞卵更有交梨大於盃君如欲勒弁嶺名共

策踰輪追穆滿

題畫海棠雙白頭為王大叅賜德七十壽

召伯蔽芾餘甘棠詠歌千載流芬芳今之王翁古召伯  
三吳有棠僅十霜其蔭已足籠丘岡上有一雙白頭鳥  
相與宛轉啼春陽問誰者圖吳周昉擬借詩史獻壽昌  
此物雖微感星氣不與凡鳥同摧藏百舌能見讒要自  
非我匹鳳皇故自尊竹實非我食安期東海棗已丹王  
母西池桃更碧白頭鳥不足招召伯之棠不足栽王翁



今王翁且偕樊夫人共登陽湖之上超然拍手呼鸞叩  
月窟是時金粟叢叢開桂漿吸罷不饑渴攬轡下儀婁  
江隈婁江父老俱白頭依依棠樹傍跪稱萬年杯王翁  
不樂胡為哉

閔希言先生道成而游戲人間任真自適聞之久  
矣今年來訪弇園談笑無間忽語余欲返武當  
故館一叩元帝先生有故人不二頭陀范子髻  
亦余舊識也因歌以贈先生併寄聲焉

足下不履頭不巾一衲寒暑長隨身有酒時過犢鼻子  
得錢即散鶉衣人馬藏陰相任兒戲熊經外道胡足論  
是口那曾挂臧否無心何處容貪嗔訪余東海近旬日  
云往天柱朝元真左璫之柳風好事為爾築館襄江濱  
夜斗低徊挂簷棟朝暾晃耀開金銀虎巖不二范丁髻  
歲寒且共棲嶙峋道余鼯鼠技已盡薄有雕虫名亦淪  
閒披緇衲禮禪客或戴黃冠稱道民三尸上天鮮可訴  
何苦役役防庚申蓬萊寧復閉賢路桃花亦自通迷津

祇愁鶴背太清瘦可載笨伯凌青旻

先生體過肥故戲之

偶成自戲

愚公自笑昔日愚日對黃卷聲伊吾那知愚公今更愚  
問著胸中一字無貧子自笑昔日貧但有載籍無金銀  
那知貧子今更貧一絲不挂悲田身貧子之貧猶未誤  
更有愚公堪笑處蹣跚兩足鈍於鴨便欲高飛向天去

又

向來學癡兒癡兒只了公家事晚歲學愚公愚公日作

移山計有官不作山不居自言可免愚與癡何當更有  
愚癡處說與聰明人不知

故將軍曾侯子澄見訪長歌贈之

曾侯意氣高天雲少小彎弓三百斤抗表那愁中執法  
入門長揖大將軍尺書立掃無諸燼一箭能收下瀨勲  
名大中山饒謗篋家貧太史絰深文脫駭始釋越石父  
買絲肯繡平原君歸來自種南山豆有飯仍誇菜三九  
春秋癖喜元凱先月旦評甘子將後亭午方餐法喜食

六時不醉聲聞酒林間  
豹蔚長迷霧匣裏龍淵空犯斗  
偶聞時事忽撫膺及語功名但搔首  
扁舟過我婁江城  
紫氣煜煜如拖旌  
主人病聾復病啞  
枉汝談佛仍談兵  
初疑藕孔脩羅出  
稍覺蓮花般若生  
天下總需公輩在  
人間豈數王郎名  
何如抖擻無明盡  
攜手金鰲頂上行

謝吳斷事惠茶筍歌一章

雨前茗芽細勝粟  
雨後筍萌碧於玉  
道人嗜茗以代酒  
且復為筍將斷肉  
吳郎昔佐鄖中閫  
拂袖高眠白駒谷

生不戀山陰八月尊亦不誇江陵千頭木為余崔舌損  
數筐更脯龍鱗逾百束初開鼻觀已芬爽久苦腸肥荷  
湯沐新詩報汝汝不俗淨洗荒飡酪奴辱但願清渭溪  
頭竹信安紫花瀨口茶租熟慧山水遞更一家道人湖  
田沒盡饑亦足

屠田叔棄秋官幕歸侍司馬公公歿乞余志墓且  
求一歌為贈

屠郎讀書破萬卷不及區區三語掾以茲耻共侏儒粟

歸侍髯翁壽清宴菽水一勺輕千鍾況有今古蟠其胃  
朝看明海飲日月夕愛赤堇攄煙虹天貽玉棺喚髯去  
肯向東園借官具婁江忽有孝廉船問我求題君子墓  
諛墓古來人所嗤髯翁遺愛吾何疑始知吳札千金劍  
奚若中郎七尺碑念余年來倦筆研欲焚棄之心更悞  
乞汝相攜老文苑人間一官味誠短

張山人平叔五嶽歌

人間再見張平叔能否長將悟真讀四明狂客偶見許

五嶽山人生不辱三花近撲二室粉雪山遠接峨眉玉  
所恨恒陽寓公石僅捧太華蓮花足歸來貧憊游興孤  
盧敖之杖不可呼少文畫壁毋乃迂胡不乞寫真形圖  
侑以廊落流金符自稱紫陽游玉都君不見王郎手創  
團焦不盈丈跬武以還皆草莽偃佺安期却來往何但  
區區五嶽觀千億須彌托吾掌

曇陽子性命三十六體仙篆歌

地衣味媿身無光欲鑿不鑿混沌忙結繩諸繁忽已忘



河馬洛龜亦披猖平林夜鬼愁羲蒼鳥跡而下至岐陽  
彼籀之徒始濫觴斯高小豎瀾遂狂吾師八法初未詳  
冶鍊至陰成乾剛悟性立命壽無疆遂謁金母朝紫皇  
授以三元明光章憫余溷濁同秕糠示以性命俾不忘  
字字心畫絃天綱三十六炁樞雷置七十二字拱素王  
星迴漢流雨露香龍跳虎卧鸞鴻翔魄奪秦漢超黃唐  
十二小劫追赤明鄴架夜色何煌煌檢之白玉尺錦囊  
五色流蘇束牙箱山卿俗書點良常王烈不識憐嵇康

紫微未肯傳楊郎我生何幸依大方此書此軀偕未央  
藍珠人鳥長彷徨

吳明卿雪山冰井歌

饒州磁缸瑩不瑕將樂塊石霜砢研無煩世尊誦貝葉  
何必玉女擘蓮花左安雪山右冰井涼思習習穿帷紗  
殷紅冽齒房陵李沈綠沁腑青門瓜中間別有清涼宅  
在君四大君不識赤脚高凌一萬層轆轤直下三千尺  
中池之外無它潤太古以還唯一色長安炙手殊可憐

驕日欲奪天公權須臾火盡灰欲冷惟有寸心猶自燃  
與君共飽冰雪意高枕鼓跌莊生眠

蘄州李先生見訪之夕即僊師上昇時也尋出所

校定本草求叙戲贈之

李叟維稍直塘樹便覩僊真跨龍去却出青囊肘後書  
似求元晏先生序華陽真逸臨欲僊誤註本草遲十年

何如但附賢郎爲羊角橫搏上九天

君有子爲蜀中名令故云

孫榮祖氏所降僊筆貽我金書陰符經跋尾云文

陽真人得道時所說白玉蟾翁始表見於世又以  
長歌四百九十字見贈頗及前生事勉以脩持且  
勸檀施聊此奉酬併效薄見於奉行仙童宜真子

壇烟裊空籠曙星翔陽鼓籟調流鈴爾時班管正馳驟  
為我寫就陰符經行間隱隱金玉潤勢表鬱鬱蛟龍騰  
三倉以前鮮此蹟八會之後不可徵此經黃帝疲警蹕  
上感玄女停輜輶天真皇人為解說一帚淨掃乾坤兵  
鼎湖瑤弓墜霄漢宛委丹檢函精靈貞觀小隸付歐褚

李荃而下訓故興蠶絲剡縷轉成贅貂尾媒瀆那堪憑  
玉蟾散吏最晚出真取捷要披榛荆三十六天不可問  
四千餘年勞證明僊翁一一為指說敢以牴牾忘服膺  
更誦長歌五百言如啖火棗通三生子瞻夢悟五祖戒  
次律賴遇真人邢惜哉二子不自振晚途嶺蜀長飄零  
即令來路未明曉忍戀濁世甘羶腥陶君已拜都水監  
勝力菩薩為前盟白叟願生兜率界海山丈室留居停  
乃知大道絕町畛兩者同出而異名鯁生掉頭出苦海

眷屬聚散如漂萍把茅蓋頭足舒縮一瓢以外無經營  
晨吸清和入玄北夕歛沆瀣歸黃庭檀施小果敢云倦  
人天有漏吾何矜更煩轉示宜真子返照面目思前程  
任是逍遙鮮罣礙未免流轉趨沈冥權奇狡獪亦細事  
麻姑見哂王方平上真重關挂玉鑰西竺覺路懸金繩  
精心九淵驪頷易失足一墮鴻毛輕百年倏忽若流電  
我為後繼誰先登功成帝命有時下拍手呼鸞游太清  
為胡進士孟弢作匡山讀書處歌

大塊下墜成匡山秀作中天五青蓮十二萬紀搏雲煙  
元氣小漏長庚顛秀作人間一青蓮綃霞釀露六十年  
兩雄相得非偶然所以匡廬李白廬白也匡廬白念欲  
宮錦幄屏風背擁九疊碧念欲宮錦袍瀑布高懸八十  
尺朝誦宛委編暮歌大洞經化為三籟透紫冥下雜棲  
賢三峽之雷霆細則鸞鳳啗麤乃虬龍鳴香爐裊篆五  
色明坐使萬境神魂清咄嗟匡山不負白白也頓負匡  
山色功名善愚人一旦調乃公采擷晡靄擘削龍從盡

收繡輦囊賣之華清宮連城一出玉環妬天子欲償價  
力士老奴從旁代喑嘆從此重瞳意回互潯陽雨夜郎  
霧采石捉月月不顧不能携得匡山去後千餘年好事  
者仍榜匡山讀書處咄嗟哉咄嗟哉李白居杜甫詩詩  
耶人耶與山並鬪宇宙奇胡郎有奇急吐之君不見六  
經萬古長赫曦如懸九夔燭四垂不然草大還直借鵬  
背家須彌安能齟齬苦戀五言七字長吾伊如此讀書  
讀奚為



壽南昌龍沙王孫七十

主人賢而好道其自號龍沙蓋取旌陽石函識  
也有子曰用晦能發枕中秘故以期之

龍沙沙高壓女牆石函字字生輝光龍沙主人七十強  
酡顏宣髮雙瞳方主人自愛衣蘿薜不愛君王賜束帛  
主人健走仍健餉不愛君王賜鳩杖有書肯學淮南安  
朝宗捧日心長丹有兒肯學劉中壘養得丹砂勝榴子  
東海狂生學面壁手種蟠桃僅三尺他年結核萍實如

要益千秋豫章色

答贈張大允丈

允丈者友人張將軍子予子也再以長篇投贈  
其一志不朽之業其一希不死之道而余皆貿  
貿焉久而徵其意乃欲得余贈言證明耳筆研  
蕪廢漫爾塞白竟不知作何語也

老夫自解金陵棘不貸頭顱鏡中白五言長城拉攞壞  
千尺糟丘乾欲坼賣身但擬作佛奴挂口何曾問歡伯

汝父差貪子雲字世人任學廷尉客偏側何偏側蝸廬  
斗大聊自適春風駘蕩啼鸚鵡門前剥啄勞詩郵商聲  
嘹亮動金石尺素錯落蟠銀鉤自云於世無所求但願  
一識韓荊州聞之白香山何人得似張公子兩首詩輕  
萬戶侯我意或不然汝家故事須封留然後歸從松子  
游我歌不再汝勿酬男兒墮地各努力出世入世俱千

秋

走筆題雪泉圖贈彼上人者不知能酬對否

仲冬十一月三峨嶺頭百丈雪春風二月天三峨峽中  
百道泉山僧住山不論歲手藝松枝令江沸未解泉能  
雪如白且誇雪與泉同味是雪為泉人盡知煮泉煮雪  
從汝為第探此雪真面目記取高秋未結時

壽封君吳姊丈七十歌

阿翁七十髯尚玄渥丹將酤深雙顴金粟欲壓烏紗偏  
呼盧捲白神脩然膝前衆綺何翩翩中有一繡去朝天  
鳳毛五色天書鮮何必身到鳳池邊

翁先以侍御君滿  
考封中書舍人

海東絳桃日並圓海人捧致珊瑚筵一顆一飽三千年  
重九日為庚辰歲曇陽僊師化辰敬成長歌一章

志感

萬厯之歲庚在辰我師拍手謝世塵西竺西池總西蜀  
陽月陽日歸陽神晴霞兩片襯腮玉夕宿數點搏眉顰  
凝然金剛不壞身獨立寶座凌秋旻是時弟子皆伏泣  
手劍忽挺光鱗鱗老生捨身侍香火自甘佛奴或道民  
談無說有世不一學士見挽傳師真少將靈跡托彤史

敢以卮言誇素臣下士聞道只大笑何意衆口成狴狴  
吾師可虞日月毀大教豈逐雲雷屯所憐內境有羅刹  
不妨外土來波旬銀環再貺許消息金篦未引猶沈淪  
朝披夕誦了何益如博日勝還日貧回頭轉盼已陳跡  
中天圓月十二新瓣香一縷斷復續風伯為我傳峨峨  
玉京斟酌沆瀣酒濁世消渴支離人雲君倘為下閭闔  
霞罕倏見扶飈輪老生行脚粗已備芒屨布衲青綸巾  
不辭躡景渡彼岸眼底一衆俱迷津更祈僊伴有鄒子

大吹黍律回陽春

趙君自練川廣文遷宰石埭石埭漢陵陽也竇先  
生子明以循吏仙去君素好道請於乩而得僊  
篆金丹四百字故以擬之

陵陽山頭黃鶴池夜半呼鶴僊人騎僊人拍手上天去  
丹臺朱竇時纍纍汝鄉麟脯那用擘吾家玉棺不得竒  
竇令不來趙令至今亦是須臾事案頭黃老五千言  
囊底素書四百字雙鳬肯似孤鶴孤勸君且赴尚書會

吾師寧齋先生南園牡丹之盛冠絕吳中而皆師  
之長郎君手植中有白牡丹一株曰尺素者尤  
奇麗因作長歌紀之并贈長君

三月一出遊季園千奇萬麗攢雕欄紛紛紅紫盡辟易  
中有一株白牡丹初疑龍池宴罷舞雙成盤又似洗頭  
盆暫卸天女冠姑射寒生雪膚栗鬱儀風細霓裳單河  
宗攻玉乍成斗鮫室淚珠叢作團優鉢曇名亦浪語瑤  
花么麼何足觀太真霞臉大醉色覩此亦學江妃酸舉



觴酬季郎化工在手汝不難得非揚州觀頭逢七七又  
何必善和坊裏延端端即使宋人琢此瓣百歲那得茲  
花看老夫久寂寞為爾暫為歡再進金叵羅屬客莫留  
殘日落不落天闌干欲去不去心盤桓皎然秀色轉可  
餐他年倘許蒞珠會別跨長離勝紫鸞

任子倦游結庵以奉觀世音大士而棲止焉署曰  
白雲俾予賦四韻

虬髯虎顧任公子釣鰲不得萬緣死捨身斷擬作佛奴

手結團焦白雲裏此雲裊裊復輝輝有如菩薩拖白衣  
汝今已現居士相無心出岫無心歸

傳令治吳有神君稱而風流文采又復稱是邇者  
解張將軍子予厄折節顧山人山甫相與結詞  
酒懽張之懷德顧之徇知欲以不穀一言蔽之  
難矣誼不可卻聊成短歌一章以志區區

春風淡沲半吳城城西長官湖水清只知百里應列宿  
那曉傳令箕星精文章不獨工製錦刀筆往往新發硎

脫驂仍禮越石父停騎先過夷門羸二生亦是千金士  
一老明農一胥靡乍逢拂拭令心折自古賢豪為名使  
義聲但擬歸國相俠血何煩報公子老夫豈有隋侯珠  
聊為二生效區區願君鳴玉趨天都驚人按劾如長虞  
吾不學吾宗癡驃騎一事不了笑人癡君其了却公家  
事然後徵逐高陽兒

題關將軍四畫

轅門黑霧草頭靡魚陽突騎俄已矣嗟然一聲如裂兕

刀纓綰髮鋒血洗白馬城頭鼓初起北人魄奪南人喜  
兗州冀州兩國賊委質酬恩竟誰是有身終為豫州死

右馘顏良

鯨波漲天天為赤鼉鼓殷城城欲圯七軍肉臭魚不食  
于侯吞聲龐侯吒爾龐七尺殉漢賊碧眼小兒黥於髑  
麥城將星忽中墮高廟神靈扶不得有血還作西川碧

右破七軍

金支翠旗晡靄中忽有赤驥騰秋空山都木客爭趨工

駝石白象鞭豐隆幻出七寶須彌宮有為之跡無為功  
永寧同泰虛爭雄可憐南北民力盡一炬贏得都城紅  
右創玉泉

昂湖龍髯久上天妖魄再作脩羅顛快意一掃漪池穿  
彼髯何為扼我咽元女再授軒皇權七家鏟削沈青煙  
寧惟晉人脂其口度支歲歲饒金錢一莫漠北三千年  
右平蚩尤

為汀州王別駕大頤贈徐守一忠

長安苞苴色動地汀州太守無一字江東齋舫橐壓舡  
汀州太守無一錢太守到郡凡二年諸吏捧手日高眠  
期對何須更刻木催科不假施蒲鞭丁字溪頭映天碧  
筆架峯峯如潑墨意適聊為始平詠興來且著臨川屐  
吾宗別駕安豐儔為言太守饒風流君不見嘉萬之間  
兩循吏老友亦號徐汀州

壽周山人婦七十

江東伯仁日日醉夜半猶傳酒徒至中厨寂寂無語聲

堆案纍纍有佳味何人不誦德曜賢願姥百歲長開筵  
莫言貧老少生計黃花無數黃金錢

屠青浦朝天歌

少慕謫僊人好為謫僊語扼腕安期生楊眉閬風圃自  
從偃僂朝羣真使我結舌安敢論讀罷琅函無一字幾  
曾丹竈有長春屠君自是神明宰滾滾詞源注東海夙  
世冰壺寸心雋肯逐紅塵萬緣改訟庭無事薰風吹勸  
耕課織春遲遲每逢藜飯欣然飽便是蒲鞭肯浪施邇

者陽侯肆其毒走決天潢翻地軸祇輸青浦不為災但  
覩蒼生堪痛哭沙頭祖席花爛斑君今此去瞻龍顏我  
不道王喬飛舄葉縣事君莫及許由棄瓢潁水間但可  
甕甕民生艱它時陰德稱帝意然後相從草大還

讀了緣居士禮補陀記

普光道場在何處補陀落伽深且廣沈生自捧圓通偈  
一葉飄然破泐漈天風不斷海潮音春山盡聳蓮花掌  
夜分清唳猶未歇忽湧波間火齊盞歸與馮郎詫奇勝



便擬青錢買單舫大士端然鼻孔間可憐兩面空相向  
幼于欲渡錢塘取山陰道抵四明觀日出歸謁肖  
甫司馬謂余作一歌壯其行拈筆得數語蓋余  
入靜來不復措意於工拙矣

張公一生江海客別余欲渡錢塘東鏡湖湖頭採春色  
山陰道上梅花風直從明海探出日別鍊赤堇為長虹  
錢塘幕府高刺天其帥司馬公宗工相留十日布衣飲  
知爾不哭迴車窮此時定笑玉生瘳土室僵卧如袁公

有足却依兀者坐得句總讓釘鉸工大鵬九萬鷄一尺  
若語逍遙無不同

書癸未二月十九日事

正月二十雷擊人却脫岑牟汗如雨後先大地皆凍裂  
白日陰森一百五二月十九雷轉急忽漫同雲雪花吐  
似應黑帝宴白帝祝融擊鼓玄冥舞辛五醉插瓊瑤花  
滕六怒肩霹靂斧桃李抽萌不敢發龍蛇誤出仍遭侮  
昨者七月十月風脩羅兩掌翻天宮千艘立沒萬室盡

魚腹飽人人腹空遺黎宛轉荆棘底吟饑忍凍如醢蟲  
催徵不顧閭井赤鞭撻但詫公庭紅吏民日望黃紙詔  
一字不濟閭閻窮蔽虧星曜已往事調燮寒暑將來功  
中天一輪方炯照爾曹勿令塵再蒙嗚呼爾曹勿令塵  
再蒙

自松江返孟孺印上人同載將登泖塔而為陸伯  
達所誤迂道迫暝始抵泖口垂渡大風驟作維  
梢久之興盡而去賦此解嘲書付寺僧

陸郎妬我游泖塔孤棹立作襄城轍雖然瞑色欲尼人  
猶可穿波覓初月亭亭乍聳青蓮花黯黯如探黑龍穴  
風輪鼓浪浪拍天地軸欲裂天無權雅無神足到彼岸  
可有凡身超四禪長年夜分報風止謝叟興盡呼迴船  
小孤親擘玉筍白老足數踏金鰲顛歸來但誦十六觀  
稱池宰堵俱眼前曼殊室利為余語多寶塔傍覲龍女  
袖得摩尼無價珠他日湖心密相與

故令尹關中王翁脩西方業而滇南王太學持即

心之說勝之頗成齟齬尋太學入謁博士選將  
行余呼酒與息諍而別

關中王翁慕樂邦焚香禮誦朝暮忙兩兒計偕從放落  
一媪牽衣任夜長滇南王生拍手笑翁豈欲產蓮花房  
野人心淨佛土淨有口不復挂西方問余誰者得衣鉢  
余亦左袒滇南王忽然別我向京輦謁選且赴中書堂  
蹇驢席帽辭江鄉此時關中意氣強遠公破例沽米汁  
留與彭澤同一觴天宮人世俱茫茫它年但坐青氍毹

不妨歸去無津梁

康生時萬將歸雲間出此紙求識別援筆數語不

復能論工拙也

康郎白皙美少年卧病憔悴春花前生門滅戶了然識  
紙帳筠牀長獨眠人間萬事盡灰冷惟有一死當胸懸  
有書不讀產不問藥鑪茶鼎恒周旋老夫見之為嘖然  
轆轤劫盡天地壞學得長生翻可憐近聞衲子時留連  
東方阿閼西極樂舉頭慈氏兜率天我佛誘汝生攀援


莫作有為莫坐禪兩粥一飯順世緣無鏡即已休磨磚  
初傳有麓陽陳山人道易非常者忽見訪小飲且  
談卜築汝寧之樂歌此贈之

六年不覩陳季方數有消息傳非常總未騎鯨吸江漢  
豈能垂月照屋梁天水尚書數行至似云買田棲汝陽  
使余憂結頓已解母那巷語仍蜩蟬今年六月大劇熱  
支頭白石弇山堂松陰漏日時到地忽有剝啄驚羲皇  
長鬚孟浪挾刺入一老襴襪隨踉蹌宛然河北病傖父

漸看漸識喜欲狂中厨已辦煖竹葉稚子尚欲施桃湯  
寒暄咄咄僅數語但道身在百不妨囁嚅槃躄態如故  
嚙決捲波差更强阿奴生計誇較可低疇種秫陂魚防  
深秋枳道梨棗柿薄暮喧食雞猪羊方朔怕饑汝怕飽  
何必揶揄燕市傍為汝屈指仍商量無家莫問樊壽張  
樊常侍為君買田宅故云有社莫傍許子將子將汝人多臧否尚書大樹足  
廕汝歲寒秀色能青蒼吳門處士多失職鷁首如蟻趨  
錢唐安能跼蹐守一方壺中酒盡長揖去男兒得意即



故鄉嗚呼男兒得意即故鄉



弇州續稿卷十

欽定四庫全書

集部

弇州續稿卷十二

詳校官編修<sub>臣</sub>潘庭筠

中書<sub>臣</sub>劉源溥覆勘

總校官進士<sub>臣</sub>楊懋珩

校對官檢討<sub>臣</sub>郭寅

校對官庶吉士<sub>臣</sub>何思鈞

謄錄監生<sub>臣</sub>藍嘉璵

謄錄監生<sub>臣</sub>袁文宿

欽定四庫全書

舟車續稿卷十一

明 王士貞 撰

詩部

七言古

長歌送趙良弼太宰歸汝

汝南夫子趙荊州  
賜金進秩何優優  
繡衣入領中執法  
符璽再帥東諸侯  
俄聞特拜叅衡軸  
時與山公計除目

雅操都無暮夜金清標總是豐年玉五十鬢邊無一絲  
尚書八座表留畿上章解綬苦欲去再屈溫綸始放歸  
謝客時稱餌芝朮別與天公乞私日子將任作月旦評  
叔寶故少膏肓疾映門榆柳遶秫田農耕社酒春綿綿  
僊行橋上好策蹇鴻隙陂頭寬放船蒲輪軋軋當公前  
欲斷不斷功名緣封侯拜相晚來事何足道哉黃潁川

白龍歎

白龍直上一千尺返照鮮雲照如射九衢萬口同一譴

膝底禾頭黯迴色夜眠可聞聲打荷曉起未見江增波  
眼中無晴望汝出不能行雨可奈何嗚呼不能行雨將  
奈何

後白龍歎

去年黑龍挾黑風萬室中夜隨波空今年白龍戲白雲  
禾頭不救赤日焚彼何暴越此何悞有水不洗天公眼  
汝龍沾沾猶自多江東流殍將奈何嗚呼江東流殍可  
奈何

題襄邸萬花深處

片片紅雲擁朱轂  
宮花萬樹看不足  
笑殺淮南一叢桂  
肯輸梁苑千莖竹  
當年設醴雪宮西  
醉來欲作花下迷  
內園小兒金裊幘  
猶記山公白接羅

王上津季問生好佛以九日禮曇師化靖出沈嘉  
則長歌見示求贈言走筆應之

不覩孝廉面唯聞孝廉賢為母兩棄官月俸不請錢中  
年厭家貪佛日聽講楞嚴終十帙飯僧或下賓頭盧禮

誦未究波羅蜜九月渡江叩淨居問我請示曇師期汝  
心在汝覓不得天宮渺茫那可知毋聽沈郎夢中語嵩  
少峯峯碧堪數但令面壁三兩年自有懶融來證汝

答贈雲僊老人兼伸鄙況

君侯行年三萬二千日頰如桃花髮如漆黃童口吐微  
妙音素女手授希夷術一歲兩枉灘江魚問我容鬢今  
何如毋論平子盤玉報許授淮南鴻寶書荷君未面伸  
契濶少小醯雞甕中活自入維摩不二門肯從賢聖求

解脫

戲作

廣陵道人禿其首叅同悟真無不有太史低眉袖金贈  
問我何為閼若口一言尚堪海大魚再語便作黔之驢  
從它注脚從它作去聲祇是前賢枉著書

送沈純甫尚寶北上

純甫自捧金鷄赦歸奉嚴親五湖社閉戶初憐此身得  
傍人再訝除書下毋論當路急需賢我自鑿坏猶勸駕



繁霜鴈作吳門冰勁節與之鬪峻嶒疇當鼓柁如漁父  
誰不呼舟並李膺此時絳灌須辟易此際屈賈仍馮陵  
承明璽郎初爆直萬里天顏今咫尺臣直轉彰人主仁  
君肥却慮吾民瘠光祿艾卿趙宮贊握手生還玉門色  
趙子夙昔同襟期艾卿亦忝文字知但令朝著有三益  
容我衡門歌四維君不見發弩健兒縱鼯鼠又不見埋  
輪使者寧狐狸丈夫有才莫小用他日舜世肩臯夔

酒間歌贈益卿先生督薊州諸軍

虎頭不以丹青聞亦不願策詞場勲飛而食肉萬里相  
直與禹跡窮風雲單書立偃鯨鯢浪尺筆能穿虎豹羣  
掃瘴銅標伏波塞揮炎羽扇渡瀘軍舌端芝草九光色  
腹裏龍泉七曜文有酒時誇北海相無錢却愛信陵君  
輔吳將軍張子布每推元歎叅幕府錢塘健兒裂肝膽  
北平飛將歸肺腑萬戶侯章許誰奪五單于頸唯吾組  
縱橫巨筆抹燕然卓歷長繩貫元兔天下英雄盡公等  
老夫楚服甘齟齬壯心幾遣唾壺缺俠語終為蒲團阻

酒闌聽汝歌都護烏鵲翻呼曙星吐似聞書記禮曹丘

莫令但奏漁陽鼓

時子念在坐君約與之漁陽

送光祿卿顧行之之留都兼簡袁司空陳銀臺

邵公清標冠人羣仲舉抗志排天雲龍江江水將洗眼  
日夜盼爾成三君翹材館人愛推轂吳會鄰鄰轂相續  
君不見淮南叢桂反招隱移植鍾山滿郁馥勿憐憔悴  
一枝蘭也要微香媚幽谷

送李使君旬宣金華部分賦得東海

繡幄霓旌映婁水父老揖余向東指此公自領符節米  
海不揚波三年矣金華僊嶂疊芙渠叱石穿雲興有餘  
回首扶桑日出處可能還記魯連居

醉歌行贈別吳明卿記與明卿別二十五年矣舟  
行二千里而訪我作十日平原飲于其別也情  
見乎辭

君如呂安憶中散二千里外輕一面我如廬女待成季  
二十五年如過電無論心腑利斷金各訝頭顱白於鬣

愛弟頻傾澹圃尊三兒遞設弁山宴河豚雖老乳尚新  
石首非時玉初剗鵝津水釀鴨頭碧虎丘薺壓龍芽賤  
為君鼓腹受杯竿為君破戒呼筆研更有牛耳持贈君  
灰心不作城濮戰欄邊木藥叢幾團溪角桃花委千片  
即令醉死亦不辭人間此人寧再見

贈王行父行父稚欽先生猶子也而師事吳明卿  
為文

王郎買舟千里來相詣開卷珠璣光照地不見竹林狂

客阮嗣宗得見阿咸差足慰武昌以東建詞壇吳叟首  
歎汝捧盤齊安赤壁一時快郢里白雪千秋寒三閭沈  
湘九辨作古人未解今人樂病向維摩乞贈言不二門  
中無此藥

有感

轉輪聖王招不起閻羅老子呼即去人言此去無柰何  
我道死處為生處苦縣僅開榮辱根竺乾始究去來趣  
記取湛然一點圓莫遣枯藤束枯樹

喻杭州邦相寄我長歌適李郡山人在坐倩作西湖圖報之而係以一詩

明聖湖頭月如璧寫出兩高三竺色詞人水調學溫韋  
醉守風流勝蘇白夜深探得驪龍珠破我禪榻江門孤  
莫言罔象渾無用也解從人倩作圖

歌贈大宗伯袁公抑之七十

尚書自起東山卧三月三臺袞衣過冶城獨湛冰壺色  
大桁不受風塵浣煙花二月明堂深是時君王在左个

未懸大夫東郡車且穩常伯南宮坐憶昔金閨並通籍  
汝鳴朝陽誰敢和龍顏乍為尺疏迴鼠膽驚從一時破  
青衫舉國望風彩絳帳諸生承咳唾不齋偶成大常醉  
沒齒已分首陽餓相君耽耽日虎視安能使汝終轆軻  
天上徵書凡幾下眼前遺直唯一箇豈惟公望重耆碩  
予亦婆娑成老大鵬扶鷁息誇各適蠅利蝸名愛偏挫  
二十四考今甫始萬八千歲誰獨柰投分竊比松栢堅  
有詩肯隨燕雀賀異時真有抑之篇

公字抑之為歲百歲武



公情

太宰夢山楊公謂不佞為作桃花嶺歌未有以應也今年春以書來云客至吳中冊有子二詩然而非子詩也能竟恹然乎哉適晨起行樂小徑落紅狼籍忽有斐然之思因遂成一歌寄公不知其能勝二贗詩否要之落句狂語彼固不肯道也公以為何如

寂莫探武陵原喧莫游玄都觀武陵漁翁不再入玄都

道士修凋散誰能衷此喧寂間大隱小隱居其半關西  
夫子衛水濱自言避宦非避秦親從青帝借元氣要與  
黔黎共此春生憎薔薇好醋指肯學河陽鬪侈靡開時  
高嶺繡成幄落處清波剪為綺露井毋令僵李疑渡江  
不用團扇辭無穀何勞神處守有露從寬么鳳棲落落  
條風散初燠主人卯睡酣意足上樹猱輕一百迴流霞  
鯨吸三千斛君王束帛貴丘園葵藿傾陽奉至尊忍但  
無言向蹊路寧容手植滿私門方朔西來踵龜坼揖余

分贈瑤池核欲識它年結子心功成拂衣種即得

甲申冬十二月十三日

長安東風散木稼德星熒熒照江社五年南陽思卧龍  
一日中國相司馬父老能追弘治日斯人豈出三原下  
即看凡羽羨歲穰坐使饑烏亦喑啞笑呼諸兒喂楮拙  
團藥且說昇平話

其二

未央璽書東南馳天下萬手皆齊眉不將兩字畧文仲

直向千秋歌子皮乃知金陵脫元氣祇為凍水標明醫  
聖王威慶與天合焉用區區夢卜為一蛇上天一蛇蟄  
即死不愛春雷知

孟春三日志事

古人不逢范希文今人却覩天水君白簡何能避綠盤  
一絲力欲迴千鈞自從聖主賜環後海內洗足趨龍門  
爭噓舌津閨月旦旋竊眼色為風雲致君堯舜在早晚  
慎莫便使巢由聞

其二

四皓不愛羽翼奇歸欲商山茹紫芝青宮再叅亞輔選  
太學仍請諸生師鷁首欲北何遲遲十四字已君房規  
即披羊裘釣七澤女牛一星誰不知何如且學苦縣叟  
小隱柱下窺希夷

渡知津橋眺小卷畫溪盡處入弇山堂之左門

問津只問弇山路橋上雙弇忽爭露桃花欲盡不盡源  
煙雨如迷未迷渡維梢小艇亦可憐一棹便抵中峰前

若教飽喫含桃去蠟屐登山也自便

循磬折溝而北轉抵萃勝橋東為瑤瑤塢有紅白

桃之屬

此溝灣環復清泚水木芙蓉相映美夕陽欲下不肯下  
為戀瑤瑤塢中綺紅者為瓊白者瑤白梅紅梅樹樹嬌  
白消仍發九光李紅悴還開千葉桃老夫久知空即色  
何必紛紛辨紅白即令枯瘦一枝橫隔水看山醉亦得  
縹緲樓背沿澗與後山對度青虹橋登平臺

老夫獨眺縹緲樓以西月臺月如霰虞山細吐一抹青  
婁水橫拖千尺練興闌欲就北窓眠無那羣奇故相薦  
大峯小峯玉齒齒桃花杏花霞片片已看麋猫出奮迅  
忽有蜚螭垂蜿蜒洞庭西頂淹水宿天台石梁苦頭旋  
枋榆亦自足逍遙何妨一日登一徧

平臺小曲水流盃處西顙飛練峽

雲根嶂前散乳玉渺渺流杯尾相逐瀑布飛湍僅尋丈  
蓮花宛轉寧九曲山陰蘭亭千古稀佳廬開先天下奇

會得逍遙此中意不須頻與向禽期

為林子騰茂才題桃花圖壽

閩中喬木俱成林林家主人饒隱心時篳竹葉千斛酒  
來坐桃花萬樹陰淡日輕煙釀芳暝翠羽黃鸝喚粧醒  
開處疑蒸紫帽霞澆時欲涸旃檀井祝君度索三千春  
有子仍為金母珍漢帝方徵上林植可容長作武陵人  
蔡文學去疾甫衰然小試首矣兩歲冬袖所作贄  
余痛飲旬日而別意欲得余一言耳沃之酒歌



以送之

吾憐蔡榮名不榮齷齪塵世名縱然茂才冠東越自有  
微尚依西京吾憐蔡去疾不去陶陶酒人疾小飲猶傾  
三百盃大醉須眠一千日兩年兩叩先生門沾沾所見  
愜所聞袖攜天台石吐作弁山雲先生捨身作道民南  
山黯沒干將文甕頭頗足中山酒祇是無名可借君

賦得匡廬觀瀑壽華存叔鴻臚

牛女之間漏銀河欲洗廬嶽諸青螺下飛瀑布九千尺

三峽轟雷聽最多華君自謝螭頭直手製青鞋踏秋色  
開先寺前夢初破恍若釣天奏無射匡廬先生道偶逢  
貽君沆瀣酒一鍾吟罷毫端雙白鳳歸時杖底一斑龍  
只今高卧梁溪上七十風神愈蕭爽入觀能令水月澄  
動操如聞山谷響作書好報匡先生東海近有王方平  
不須誇盡開先瀑行見蓬萊漸淺清

醉茶軒歌為詹翰林東圖作

糟丘欲頽酒池涸嵇家小兒厭狂樂自言欲絕歡伯交

亦不願受華胥樂陸郎手著茶七經却薦此物甘沈冥  
先焙顧渚之紫筍次及揚子之中泠徐聞蟹眼吐清響  
陡覺雀舌流芳馨定州紅甕玉堪妬釀作蒙山頂頭露  
已令學士誇党家復遣嬌娃字紈素一杯一杯殊未已  
狂來忽鞭玄鶴起七碗初移糟粕觴五絃更淨琵琶耳  
吾宗舊事君記無此醉轉覺知音孤朝賢處處罵水厄  
傖父時時呼酪奴酒耶茶耶俱我友醉更名茶醒名酒  
一身原是太和鄉莫放真空落凡有

壽喻處州父太翁八十

此翁愛我能詩歌我愛此翁心不他  
兒騎五馬不自貴  
日饗二簋猶云多  
太守放衙日  
卓午却著斑斕學萊舞  
石羊山頭薦修脯  
琵琶洲上奏簫鼓  
人生八十古更稀  
有子福德增崔嵬  
生來鶴骨元偏瘦  
勝後冰肌轉自肥  
余郎非親應即故  
壽翁珊瑚未肯顧  
賤子為裁玉筍雲  
丈人且進金盤露

題秦侍御像

多其角鶩其目長安貴游不勝觸隳厥弢老空谷趾  
其麟儀其鴻歸與閭黨偕春風如林長眠縱大空貌人  
貌君十得四我得君全君可契大都知希乃為貴

秀州李茂才元白訪余婁江道中出近詩一卷甚  
佳留飲劇談時及屠長卿徐茂吳遂成短歌贈之

少年好文仍好詩清揚藉甚瑤林姿楓江葉落過余舫  
一寫十斛明珠璣書生有才莫教大神僊祇藉刀圭做  
君不見屠郎徐郎一人半造物小兒苦摧挫

郡伯嘉興沈侯自署曰五湖釣叟吳人孫枝窩圖  
周天球篆首而世貞歌之

蟠溪老翁八十餘此翁釣侯非釣魚若言軒冕異丘壑  
虞聖亦曾雷澤漁胸中但貯小雲夢焉用形跡分區區  
沈君家住蓴鱸鄉綠蓑衣底天茫茫一朝鵬化擊寥廓  
九萬里翼雲飛揚雖然得意挂朝籍忽忽舊游中不憚  
晨從大國問烹鮮夕向窮閭憂竭澤孫枝為寫湖頭色  
展著煙波流几席賀監禿酒徒病昏無所知始乞黃冠

去鑑湖能幾時桓家小孺子躁心在塵網何必解郡符  
始稱五湖長而我故是王弘之釣亦不得神長怡藉令  
物色羊裘去終許菰蘆明月知

游鳳皇臺委壘不稱不復和昔韻而戲作此歌

太白絕代才曾歌鳳皇臺鳳皇雖逝臺不改太白千秋  
句猶在高皇定鼎萬寓同此臺附之益豪雄凌雲銅雀  
皆下風及我游斯培塿土堆如一蚺蛇偃卧蒼苔三山  
二水不到眼深谷高陵或有之我笑鳳臺非昔時臺亦

笑余鳳德衰爾毀不可復余衰猶可追明年便逐孟虧  
去籠畜此鳥如家雌

報恩寺塔歌

壯哉宰堵波直上三百尺金輪撐高空欲鬪曉日赤浮  
雲遏不度穿泉下無極鍾山頡頏一片紫餘嶺參差萬  
重碧高帝定鼎東南垂文孫懽啟燕王師燕師百萬斬  
關入廟社不改天樞移六軍大酺萬姓悲欲向罔極酬  
恩私阿育王家佛舍利散入支那有深意中夜牟尼吐



光怪清晝琉璃映纖碎帝令攝之寘塔中寶瓶嚴供蜀  
錦蒙諸天悉憑龍象擁千佛趺坐蓮花同匠師琢石細  
於縷自云得法忉利宮亦知秋毫盡民力謬謂斤斧皆  
神工波旬氣雄佛緣盡紺宇雕闌銷一瞬烏芻額爛走  
不得韋馱心折甘同燼海東賈客莫浪傳此塔至今猶  
巋然老僧尚誇護法力永寧同泰能幾年

重創瓦官寺閣過之有作

昔時瓦官閣高與天崢嶸業火一燒盡不能燒却萬古

名蓮花比邱苦緣薄傾鉢誅茅覆簷角不見如來減劫  
時丈六金身亦不惡

初秋同少宗伯棠軒李公飲大司馬月溪陰公署  
中因贈李公專求和韻

玉井峯頭結冰李小日移栽上林裏蜀道高歌有謫仙  
汾陰一曲真才子鑑湖道士老且狂相逢但飲黃鱸傍  
時名積漸耐龍尾酒德依稀猶鴈行今夜尚書署中設  
蜀管吳絲禁不發為君佳句似陰鏗莫教孤負長干月

題馬鮮梅鮮于樞長歌真蹟後為詹侍御明甫賦

詹家琪樹五百年色歷萬卉當春先根如鐵龍蓋如玉  
能使石壁增清妍馬兒丹青得父筆為梅傳神神頗全  
當時主人大好事徧乞虞揭諸名篇伯機一書獨道發  
與圖三絕嗣鄭虔老梅枯死圃亦廢此卷一分沈虞淵  
仍孫侍御出按部夜有光怪騰奎躔不知何人致此卷  
捧視絕倒幾成顛延津劍合猶化去合浦珠返寧天然  
歸陳祖廟集子姓天球大訓不敢前金華山頭紫鬱淳

鰲溪水脚青潺湲故家何必問喬木五尺絹素高摩天  
他時努力效陽實與子別結千秋緣

蟠龍峯歌為大司空豫章李公追賦

蟠龍峯高高插天下有洞穴龍長眠有時行雨徧八埏  
橫空萬尺銀蜿蜒忽然縮入一鉢間永脫金翅牙關緣  
君不見南陽卧龍氣太烈一片心為豢龍熟定軍山頭  
嘔成血何如此龍得天訣與雲卷舒倦即歇

吳長君七十長歌君大叅明卿兄也

昔日杜甫成狂歌自言四兄巢許倫雖然齷齪家人語  
能使千載傳其真吳卿今年六十五汝兄七十貌更古  
縱令湖海無拘束稍襲衣冠傍規矩來種秫魚種杭  
手抄魚經復酒經有酒直尋長樂塢得魚且泊滄浪亭  
聞道甌窰洞中石移來半是愚公力縣官第不橫索錢  
野老何妨且爭席紅顏宣髮青方瞳綠衫朱黻斑斕中  
庭前參差幾玉樹雲表偃蹇雙冥鴻丈人得之必辭避  
愚者是兄賢者弟但呼堯世洗耳翁何必要第五之名

強驃騎

人日金陵憶亡弟

去年風雨正月七猶與病人同  
此日猶是人成非中庭紫荊漸老醜  
一半猶青半枯朽  
縱青能得幾時榮  
憔悴侵尋解憐否  
杜陵野老雙鬢星  
蜀州人日感凋零  
聽歌黃鳥已垂淚  
何況枝頭啼鵲鷁

壽柳州六山陳封君

六山矗作西南柱  
主人行吟讀書處  
為文雅受羅池法

柳州碑

有子能工天馬步

六山之主  
山曰天馬

只今行年六十七宣

髮朱顏美無度更約它時大藥成笑與羣僊弄煙霧

雙梅歌為方塘張封君賦

瑤臺僊姝畏姚妬化作君庭雙玉樹大庾萬條看更俗  
隴頭一闋吹不墮張果鯢齒如編銀要與此樹爭丰神  
飛觴三雅媚殘月搖筆片語開新春有子移根奉溫室  
皎皎冰姿射霜日莫言子作書生酸要與君王調鼎實

高皇御槍歌

臣自守太僕於午門之五鳳樓恭覲文皇帝御用  
槍槍有號帶退而作歌蓋十有三年矣而起家南  
司馬復於故宮之五鳳樓恭覲高皇帝御用槍凡  
二大者幾盈握脩可丈六尺疑即用以步戰者也  
小者脩殺四之一圍殺亦如之疑所謂馬稍也滁和  
之間蓋無日不親御焉武昌而後不復自將矣此  
槍樹之御座右以示子孫毋忘王業艱難嗚呼休  
哉臣不敏復作一歌而年老才盡有愧於舊多矣



真龍魚服事假王當時四海一滁陽椎鋒跳盪無前敵  
馳射威神不可當猊鎧淋漓戰血蛇矛天矯盤秋霜  
此矛大細凡二柄用之掣電舒神光橫驅鐵騎掃建業  
直擁舟師下武昌登壇拜帥徐與常始握中權不自將  
按圖一詔制萬里挾箠兩兒鞭八荒羽書絡繹報宣捷  
虎殿委蛇進講章干戈倒載三十襖禮樂明備同軒皇  
玉几親憑誨孫子艱難往事毋輕忘蟠螭小架二矛立  
儼置五鳳樓中央和弓垂矢俱辟易禹謨舜典同輝煌

馬上得之馬上治陋哉漢主胡弗詳平城七日脫餒鬼  
猶向沛兒驕故鄉嗚呼何必猛士守四方

為王太宗伯題文筆峰

五指冠國琛一筆幟文苑矯矯中書君不產中山產瓊  
管黑雲堆墨醺峰端橫寫南天萬行滿東亭且莫夢如  
椽丹紙黃麻好細傳更聞欲續司空志大費君王側理  
箋

金陵遇中貴人結好甚深於余歸追送棲霞浹日

夕乃別感而賦此

十載供奉皇青春顰笑警效若一身御馬騎從內殿出  
常飯飽飫天厨珍覆水翻知不收好回首同儕竟誰保  
不辭肝膽傾向人自拊頭顱歎將老偶然意氣憐禿翁  
杯酒翻瀾蕭寺中天與清閒莫輕擲且踏紫陌收殘紅  
長歌贈別朱大夫

大夫朗博亮直君子也余幸有一日之知又幸  
官留都有二載過從之雅庚寅春謝病南歸攜

酒攝山送別因成此歌贈之弇中之約幸毋忘也  
朱大夫顏亦朱碧瞳宣髮微髭鬚皎然玉立金陵衢少  
年意氣龍可屠跼蹐且當轅下駒三為巖邑吏道舒小  
轉亦握專城符臺評誤及當下除立散五馬歸鄉閭新  
詩一卷酒一壺杖頭百錢從有無蠟屐踏遍春蘿蕪醉  
眼且拊雙明珠大者光燭牛女墟秦庭好易十五都今  
汝不樂何為乎朱大夫我能寫汝抑塞壘塊之豪麤汝  
當振我闔閭委頓之衰途攝山酒盡未易沽揮手便別

母跼跼朱大夫此後莫喚王尚書老夫新銜長五湖明  
年短棹游東吳弇州糟丘不汝孤

至京口承陳從訓相送丹陽道中留贈

京口三山產三傑中有陳生擅三絕愛將肝膽輸故人  
除却圖書無長物老夫抖擻金陵塵勞生遠送情更真  
報汝弇中自天地明年共賞糟丘春

四歌

余同氣弟一人女弟一人從兄弟四人其三從

已前逝女弟之逝在三十年前獨餘兩弟耳乃  
以三載中奪之又奪我猶子駟何其酷也歸計  
既成於私懷小暢念及逝者煢然一身更自淒  
楚因裁短歌四章志之悲咽之語不敢言文也  
季方少我纔十齡事事我覺難為兄前年卧病辭清卿  
我更失足金陵城連枝一枯僅一榮悔不晚耦鹿門耕  
嗚呼汝今已足垂千秋鵲原血淚何時收

其二

吾家羣從兄有四兩者是兄兩者弟少者奕奕負奇氣  
更復溫良得吾意一傾十斗不辭醉至竟此酒為身累  
嗚呼衰年得歸亦不惡誰與街杯共懽譔

其三

妹年三十棄我去不能哭汝哭我父我今六十仍加五  
汝骨恐作虞山土柔徽令則可指數痛無形管為揮吐  
嗚呼崦嵫之日不可留人生壽夭同一丘

其四

我有三雛弟加一汝更翩翩白眉姪孝友溫文鮮倫匹  
雞骨支牀更奇疾三十沈沈棄白日下從龍舒萬事畢  
嗚呼歸來庭玉俱崢嶸忽不見汝心魂驚

弇州續稿卷十一



欽定四庫全書

弇州續稿卷十二

明 王世貞 撰

詩部

五言律

送康永錫游南雍

太學今賢數金陵古帝畿  
何人堪絳帳有巷可烏衣  
徙箸防炊玉携家為斷機  
江山六代色斟酌錦囊歸

用晦以三寸篋貯金字佛經呪二十餘卷精工之  
甚感而賦謝

函端舍利發知爾不成空老眼粗能辨僧翻未易終真  
文玄奘熟梵字苑成工大類羣龍藏收來一鉢中

寄汪生

十日平原飲星文動有無名高多借客俠倦始兼儒肝  
膽誰堪寄詩篇仲不孤尊鱸地何限吾已號潛夫

審錄范比部枉駕小園

刀筆驚行部干旄廢掩關公才解雷雨吾象遜天山暗  
壑歌留響叢花酒破顏忽聞栖鳥磔初見火城還

子循子威諸賢過幼于石湖別墅其高處為新郭  
城陟范紫微遺宅也

湖爽杯從益天空鏡對開亭依新郭壘岸隔舊郊臺詞  
筆誇吳會漁歌起越來無妨醉題壁君是紫微才  
用周益公  
事

再題幼于浮黛閣

黛色浮不盡為君染琴書歟乃一聲發千山殘照餘星  
河挂檻靜嵐霧撲窓虛豈以元龍簡能令求仲踈

袁丈憲副馬大叅馮少叅薛進士邀游石湖

群舫來爭客相逢盡故人鯖寧五侯味酒是一家春湖  
色能寬醉鄉情好任真呼童掃磐石餘興欲垂綸

弔陸叔平墓

窮劣深山徑斯人長夜居誰憐一杯土却掩五車書玄  
素名空在丹青代不如齒牙吾自有從此倦吹噓

又

一代風流遠窮交雪涕傾老魂招不得名蹟見猶生聞  
遂山陽恨留芻孺子情女牛高自若第減少微明

宿王玄靜石湖草堂

談笑風生坐淹留月滿筵湖光來澹蕩竹色進嬋娟練  
雀穿簾美銀魚鬪筴鮮從呼君且去吾意未迴船

看王子父雅宜先生舅六如居士像

風度吾前輩冰清汝外家虎頭痴更絕龍爪勁誰加一

代珠雙襴千秋劍並華椒漿欲有酌異世起長嗟

徐長孺投詩見贈且訂山園之約以小律為答仍  
促使來

客喜登龍事吾寧隱豹身一丘安舊業萬卷厚歸人友  
誼深從澹時名緩更真芙蓉池上月待汝共垂綸

畏客

年來微倦客客至轉無期佳事少入耳新詩難解頤何  
如案頭帙侑我手中卮一枕松陰下從它夕照移

送陸楚生弔童子鳴

絮酒輕千里生芻托寸心一貧無挂劍百感為分金  
淚向吳江盡思偏越嶠深山陽夜中笛腸斷不堪尋

弔童子鳴

飯顙山頭骨陵陽石畔心隱能逃小賈窮不廢長吟婦  
泣黔婁被兄悲子敬琴

生與兄友愛甚

龍丘墓堪傍千古是知

音

寄耿中丞時服將禪矣

琴彈何必就太古有餘音歷盡冰霜色悠然天地心一  
星堪審象九夏望為霖倘及衡門叟秋江煙水深

寄張羽王別駕

詩窮不肯送宦拙與誰論日月青衫老風霜白髮新平  
津無上客楚澤有孤臣問我秋來計清尊夜夜親

方衆甫過我山園有贈

姓字非豪舉文章是大方一尊凌峯巒並艇狎滄浪宛  
爾祇林日悠然得汝長久知名避我只合醉為鄉



孟孺同方君見枉山園

汝挾方干至吾欣徐穉留小談遲日過晏坐白雲幽進  
履藤蘿頂迴舩杜若洲沾沾自喜色可為少年游

贈彭儀賓稚脩父也

有驥今千里乘龍是昔年國香叢桂近庭玉一枝偏身  
是倉曹志人傳山水絃洪崖莫冲舉留作地行僊

范顯先于胤先二茂才贊文請序仍以扇乞詩聊

贈一律

二生饒感激百里覓知音却謂蓬累足將之瓠落心

其文

曰大瓠編

大璞勿輕剖良工能見尋問余何所作日撫無絃

琴

罄室先生為月泉上人畫一錫一鉢聊成短贈

道人杖一錫一鉢復隨緣鉢中貯秋月錫底飛寒泉  
警鶴有時響收龍都靜眠但令無罣礙不愛辟支禪

送沈進士病起還朝時其父鴻臚君無恙有弟同

榜而謁選當得邑職

羨爾趨庭後楓江引畫橈歸心緣愛日起色為觀潮玉  
樹名元並金莖渴自消縱令甘手板不削沈郎腰

贈鄉進士曾嘉襄乞其父志銘還楚

而祖仍而父先朝兩諍臣世誇龍額舊家有鳳毛新細  
雨為江色清尊別故人龜山一片石聊與助嶙峋

和答陳太守師

白下多清咏朱方豈倦游為閒拋五馬餘興買扁舟愛  
有銀鈎贈慙無玉案酌武林門外色倘許故人求

壽曹茂才六十

有子華封祝無車下澤身  
杯盤隣舍事談笑自家春  
白雪矜吾黨青雲讓後人  
胸中千古在知汝未全貧

贈俞老

君真俞跗後醫術晚通神  
身作吳楚客從呼秦越人  
祇憑黃閣老容汝白綸巾  
何限虞山色春風縱屐新

李子華見過偶成

此身猶健在歸計日蕭疎  
爾挾軒皇問吾安汜勝書聞

真愛羅雀懶至怯烹魚

謂書也

垂死猶貪客徐卿未易如

戲贈陸兄

見汝佳公子俄然雙鬢華  
有家不解問欲問已無家  
鞭巷一壺酒弇園千樹花  
應門如不却老去足生涯

送張仲立游南雍

念爾芳蘭秀能令一坐清  
毫端寧下駟眼底誤蕪城  
獄劍偶然鬱臺金元不輕  
試探平子篋應已賦南京

汪禹乂棄家業詩携其集就質賦此為贈

無家何必問詩卷但相隨爾愛千秋業吾慚一字師才  
高輕自恕身老易成窺勿作虞翻惱名山尚可期

汪惟一前以五湖長印相授而衍一者字今夏再

刻古銅章見貽喜而答贈

銅章仍再錫知我莫如君果署五湖長應須十賚文棲  
遲寬日月汗漫足風雲尚有糟丘地苴茅倘許分

詹錄從孫予告喜而寄之

相如歸自使稱病乞文園名為抽簪好官寧負弩尊聞

茶新勝客種竹舊生孫若欲親花鳥來從老圃論

李國賓持服還吳尋返豫章邱諸君約詩為贈

鳳去洪都里烏啼茂苑枝琴彈不成調簫奏有餘悲荀  
令香時歇何郎粉漸隳唯餘八公在為返鬢邊絲

送汪惟一乞子與墓文

玉樹看埋土誰能不歎嗟劇憐唯宋玉能守是侯芭氣  
色開中古文章屬大家即今苔水上時吐赤城霞

壽封孟安人六十

齊眉初罷案九臆義仍方不待三遷後懸知二孺良檢  
衣饒舊弟行稼有新莊況是宮壺酒能無一舉觴

壽孫指揮五十

五十孫都尉長吟鬢欲蒼金魚寬貫酒銀鴨細焚香祭  
酒推詩社將軍和栢梁還餘雙紫燕拂拭便如霜

讀酷吏傳

薦士如張史忠言有邳都兼聞尚廉儉不肯學貪汙遺  
橐千金累同時五族誅溫舒今眼底能達漢廷無



讀陳子昂傳

未必射洪令能殘陳拾遺天寧私酷吏人乃厭清時猗  
犬才偏嚙冥鴻徒覺遲雖然班管在段簡也名垂

讀匈奴傳

匈奴新得意入塞即橫行賤老長從俗趨貪不顧名抗  
衡非上策避地且全生和好終難恃那曾念舅甥

讀魏其侯傳

魏其雖失勢侯印尚纍然立散千金賜寧慳數頃田當

時籍福解遠勝灌夫憐尚識沾沾意田郎跪起年

黃玄甫國士也數困公車以其業來質賦此期之  
擁棘叨掄士驚心字字珠至今傳晉問何自訪吳趨九  
折心偏壯千秋事不誣春來眉黛好莫訝入時無

汪山人過山園後見寄新詩有答且邀之

汪倫贈我歌歌罷柰倫何久客吳音慣窮愁楚調多雪  
花杯底玉雲葉鏡中波如此園林色何妨喚棹過

初春杜門即事

風雨動經旬空齋鎖病身篝燈續殘晝煨火謝陽春

小齋

寒暄為甚

忽有衝泥者能言勝事新始知行樂地不著過時

人

蕭使君有惠政於吾州別十有六年矣今以請碑

文見過為賦三章志別君宦薄然五世同居近

有義門之旌故末章及之

自聞拋五馬強半在杭州古洞煙霞暖西湖菱芡秋乞

碑尋大令買棹下長洲好是家人語蕭郎愛遠游

其二

伊昔求羊逕曾為半刺除只今羅雀巷重枉故人車舌  
在牙從少官貧氣自舒旗亭父老在杯酒莫教虛

其三

八葉台司重西京甲第尊蕭家當日事不必至今存刺  
史開廉里君王表義門還聞書百忍餘慶逮兒孫

憇徐氏園內贈主人

愛汝辟疆地能為求仲開小鳥啄林萼幽蟬抱庭槐掩

映竹間帙逍遙池上杯灑然清風度乃是主人來

冬夜獨步

冉冉益冬盡熙熙如暮春風光不惡夜月色故親人棲  
鳥為三益空倉是四鄰偶然成小步幽意欲誰論

空山者法門中獅子兒也俗臘半七十矣而猶童

真安居羯磨精進般若前後受持經典何止十  
夾猶以未明心要徧擬叅方詣余言別叩其所  
之則云將汎嘉禾抵餘杭奉楫推於月庭之席

敷法具於蓮池之堂然後折蘆渡淮飛錫登高  
放達摩之少林壁掠文殊之金剛窟束銅固腹  
始歸故山余螳處一穴不能偕也姑為四韻以  
壯之

匪嫌貧里累聊使俗情捐一鉢初為日雙趺不計年浮  
空杯渡事探險石頭禪從此東林月無心處處圓

月來不能盡却酒而數有致黃魚饌者擬齋月斷  
之成此二律

首夏清和節江鄉櫻筍餘時時呼白墮頓頓食黃魚謬  
忝道人服虛迴刺史車未論他日事捫腹定何如

其二

捨家成底事對案獨何心未斷柴桑酒翻愁綿竹音門  
人議糖蟹少婦却鮮禽從此清齋月饑腸任自吟

送吳甥侍御病起還朝

不妨神武署重見惠文冠起色清時易歸心往事難  
映珠吾愧舅完璧爾能官共道朝陽色和鳴有鳳鸞

吳侍御過訪草庵言別

柴門厭煩暑忽有一驄過非以清涼地將無霜色多汝  
為真御史吾久病維摩莫羨冥鴻遠猶能罾網羅

徐澤夫有事外寄而膺試北上賦此送之

君行負奇尚不為急知音白雪巴人里朱門蓬戶心風  
塵吾道在雨露世恩深別有凌雲賦從它競上林

慰殷無美哭女

殷生抱和璧悠然掩柴荆不咏顏逯句却鍾夷甫情夕



枕斷紈影朝飡稀珮聲蒙莊亦難解唯有誦無生

題月槎贈張鍊師六袞

虛隱即大隱羽流豈凡流早佩玄都籙晚陪松子游步  
虛清籟夕燕坐絳河秋歲歲槎來去如儂博望侯

寄廣州陳司理因簡黎惟敬少叅

閩鄉大海邑日接嶺南雲

君閩人

鮫室應無淚羊城近有

君蘭金雅自慕蘿薜怯相聞

君累致誠之詩

倘下延徐榻黎生

可借分

題畫再壽瞻美弟

五十非與是醉來都不關林餘仲長宅壁有少文山小

婦能調瑟慈親好破顏時時嘲子晉何事薄人間

瞻美每不

許余學仙所咏皆實事也

陝有李叅政封三代

世家唐趙郡吏治漢扶風今日璽書下君王恩數崇綸

音依八座豔色動羣公原氏阡頭石將無五彩虹

潘景升少有文以書介仲淹乞余誌母作此寄之

青鬢有潘郎結交多老蒼我安居士病不入少年場金  
石千秋重松楸一字香雅知榮施骨真勝孝支床

歐楨伯工部轉正郎寄之

坐嘯玄熊署行吟朱雀桁詩仍小工部官是正曹郎六  
代心逾遠三山鬢共蒼故園黎老在單艇釣滄浪

其二

一枝真邾桂五嶺復佗珠水部官仍好風流代不孤錦  
囊行處有綵筆夢寧無從此鍾山色俱應屬大夫

送袁大夫遷魯右相

豈不惜循吏其如佐寵王  
欲觀周禮樂須待魯靈光  
轍遠春猶在裾寬日自長  
可增藩相秩借爾卧淮陽

其二

攬衣從父老灑淚向河干  
名大游梁易時平借寇難  
祖筵留日緩齋舫受風單  
自愛東平美非關薄漢官

穀日同敬美携榼訪家元馭因飲元馭園亭

朋好簪全盞園亭酒更宜  
賞能偏穀日歸不待瓜期箕

賴人從厭羲皇爾自私寧唯嗣宗眼柳亦吐青枝

其二

耦耕吾愛弟骸乞爾從兄綠蟻先春色黃鸝不世情漸  
來銀海眩忽有玉山傾醒則誇醒好歡娛醉裏生

肖甫司馬貽書有歸歟之思而受賑出督寄此識  
感

竹林名士七草野病身孤寂寞餘丹竈凋零任酒鑪幾  
人私日月吾計晚江湖賴有張司馬旂常事不誣

其二

蜀道難仍否吳天去轉長  
吾寧忘綿竹爾可念銅梁  
鵬飛同適滄桑事亦常  
此心真不住何必論行藏

孟達仲達二兄見過恬憺觀談玄  
因成二章為贈  
碧雲暮未合二妙偶相期  
深語費春茗清齋餘露葵  
千秋別有事一字乃吾師  
從此逍遙路翛然去不疑

其二

尺鷃雖無慕雕虫敢自矜  
對諧物外賞甘得區中憎  
密

坐探金鑰清言轉玉繩當時許長史曾藉華江乘

汪仲淹兄見枉致長公伯玉司馬乞碑書有寄并

贈

仲子過從日難兄涕淚餘文章司馬法生死孝廉書一  
見一回老千秋千不如唯強乞骸弟早晚共樵漁

寄周小史

鄒陽不仕漢王粲尚依劉滇海無歸客襄江有寓侯賣  
文寧活計設醴可寬愁薄業湖田在粗饒雀鼠謀

答謝赫侍御存問時按關西

喜乘驄馬去窮訝雁書來憶舊存  
蘿薜將春施草萊欲  
酌吳地縞翻借隴頭梅聞有西征賦誰當句裏才

顧山甫過飲道院作

春眠起剥啄簷鵲亦群喧草色上盤饌  
桐陰清酒尊君  
行不易跡我醉已忘言尚有歸途月依依戀  
筆門

贈西域無名苾芻

離車邈地種能不羨支那久客秦音慣  
無師梵字訛羈



提游自穩檀越見偏多莫以流沙隔猶堪隻履過

送鄭司訓會試

教授爾家玄廣文重見度九經談若注三絕品誰先閩  
海長虹吐吳天化雨懸諸生侍綿叢從奏未央前

過青浦屠明府長卿移舟見送

青浦橋邊水人稀明月多誰移木蘭並知有鄂君過會  
意言從簡忘名氣自和脩然兩不厭柰此堠亭何

其二

為別亦已久相逢俱嗒然君離綺語障我愛辟支禪涼  
露紛紛下新蟾的的圓試觀流水意折莫在無絃

屠青浦以都布單衣見衣口占謝之

白越白於霜裁將換芰裳輕鮮傲西氎寬博謝吳裝縞  
帶吾鄉重綈袍汝意長祇驚居士服時有令君香

劉秀才棄官學佛書此贈之

脩然持一鉢信足傍叢林却笑龐居士猶多處置心銜  
花境自小結草坐從深覓已了不得可師何處鍼

雜言十章

垂老媿無明勞師為證盟  
間關離欲海抖擻破疑城  
祇樹堪吾止阿蘭息衆爭  
此生元自惡何敢學長生

其二

誤守楞嚴語嘵嘵品十僊  
那知鍾呂輩來自靜居天  
無欲俱觀妙頑空轉碍禪  
差池在毫末一透即成圓

其三

明珠吾自失顛倒問西隣  
識得我前我能生身外身  
轉

頭離夢幻到手覺精神若勘張平叔何曾誤學人

其四

失計從人笑迂儒敢自誇低頭向學地節腹慕貧家黑  
業根猶在玄關路轉賒差強在火宅覓地種蓮花

其五

維摩默不語迦葉笑仍微此意誰能會悠然自道機百  
千萬偈後四十九年非若有雲門棒能令狗子肥

其六

謾道隨緣好緣多不自禁偶然情用事陡覺病拈心坐  
石蒼藤蔓開門黃葉侵誰言朝市隱終讓入山深

其七

偶有郵筒至詩編刺眼新雕蟲真自小畫虎竟誰真咄  
咄緣貪世沾沾各誤身浮名與生盡零落北邙塵

其八

合眼從新事關心為古懽時清小草易道在曲鉤難物  
論元相暖心盟可遽寒聊因衆毀力長得此身殘

其九

七情聊試勘唯愛覺難論已自傍倫物兼之有我根搏  
沙一以結歸路遂長昏是故雙林叟功成始報恩

其十

江南金粟地家詫却詵技世法聊成美天心或見私門  
秋駟馬結龕夜一燈隨空有吾何敢寵驚聊所師

騏兒應試擬不捷後入山訪道招之

古時稱薄命今不盡紅顏戰即從三北丹須待九還吾

猶滯方內汝可厭人間欲舉團藥話歸來共掩關

送蘇山人謁張司馬

十載乍相見居然猶敝裘青誰嗣宗眼白有子卿頭幕  
府如論舊轅門或見收便能譏陞楯兩不善身謀

其二

蹭蹬霜毛益彷徨一刺陳自憐侯白口不救范丹貧老  
作錢唐夢寒思黍谷春留侯有前箸借爾辨如神

讀馬司空侍御父子集因贈其子從甫

死奪淮王膽生批漢帝鱗  
兩朝推父子萬古見君臣  
南浦叢祠舊東閩汗簡新  
李繁有家傳今爾獨何人

楊文學伯翼脩園

五畝蓬蒿地脩然都不營  
有花自開謝無酒亦沈寢  
永任週遭碧山從映帶青  
故人勞問字楊子倦談經

徐善長明府見貽二作奉答併贈

君是名家子俱稱小令才  
風流列城最保障古人哉  
行復乘驄去聊因馴雉來  
何當輸翰藻為我賁蒿萊



辱襄王殿下有精鏐輕策之賜敬成五律為  
謝

襄王愛秋氣命駕陟蘭臺偶聽巴童曲遙憐宋玉才涼  
風紈扇發明月燭銀開莫謂恩波淺窮魚正曝腮

曩余為胡元瑞序綠蘿軒稿僅寓燕還越數編耳  
序既成而元瑞以新刻全集凡十種至則衆體  
畢備彬彬日新富有矣五言古上下建安十九  
首樂府等篇遂直闚西京堂與余手之弗能釋

也輒重叙其意并寄答五言律二章

穆穆清風至泠泠白雪傳登壇牛耳定絕代鳳毛騫嶠  
起三曹後橫行七子前預知千載下重數建安年

其二

屈指中原業居然大國風名方千古借才豈萬人同歷  
塊孫陽駿摩霄北地雄讓君稱鼎立吾已問空同

再贈馬從甫

宛爾一儻父而無操粵音感時多異調折節是雄心黯

澹將垂纍次且欲匣琴新豐一斗酒細與話浮沈

贈游生宗振

短褐不掩骭束書猶半囊但矜詩律細寧似汝兄狂末  
路乾坤狹浮生日月長却疑枚馬輩何技便游梁

壽靈壁侯母鄧夫人

欲取長淮水來添上壽觴家聲自高密婦節許共姜錦  
綉星辰爛宮壺雨露香試觀堂下客若個是張蒼

送王將軍元周總江北周家橋行營

二十四橋地周家第幾橋  
甲光天塹日帆色海門潮  
鷺鸕雄難撼鯨鯢黯不驕  
雅歌仍緩帶知是右文朝

其二

一領分符寄昂藏  
便不羣指揮雲鳥陣  
訓練水犀軍  
越甲千層組  
度刀七曜文  
故鄉衣帶地  
饒吹可相聞

永嘉張二汝紀謁選北上入訪山中感舊有作

往事浮雲變離懷日月長  
汝衫猶未綠吾髮久先蒼  
詩好能如父家貧不拜郎  
唯餘衛公笏尚可獻君王

過普濟廢寺遇秋空上人作

寺古僧廬盡泥深舊徑非偶然逢宿衲莞爾露禪機宿  
火撥猶冷殘燈挑尚微炊煙處處起日晏澹忘饑

除夕作

愛子公車辟賢昆復拜官身中粗嬰鑠眼底更團樂榭  
葉鑪初暖椒漿盃不寒唯憐萬室盡詎忍一家完

其二

三百六十日歲朝俄至今法雲趺坐老天籟咀歌深一


飽無餘事千秋有愧心明朝是明歲從此覓知音

程孟孺以善詩及書與余交十五年矣今春過余  
則書法益妙云將入燕應中秘之募索一言為  
贈余久厭筆研且畏綺語虛名落長安人耳不  
得已勉成二律塞白孟孺慎毋以示人也

程邈創今隸君稱其家兒一入中郎冢頻書幼婦碑苦  
心變鉤磔元氣走淋漓莫以家雞賤猶堪集鳳池

其二

有句不能贈非關無故情如何帝城內復著老夫名細  
軟青精飯香柔錦帶羹可能留少日為汝話無生



弇州續稿卷十二